

Communicaziun a las medias dal 29. d'avrigl 2026

L'economia grischuna sut squitsch: sminuziun dapi l'atun

Suenter l'onn 2025 tut en tut solid è la dinamica da l'economia grischuna sa sminuida marcantamain dapi l'atun. A questa conclusiun vegn il Monitoring da l'economia grischuna actual che la Banca Chantunala Grischuna (BCG) publitgescha ensemen cun la Scola auta spezialisada dal Grischun.

Cun ina creschientscha da radund 1.2 % è l'economia grischuna sa sviluppada il 2025 levamain meglier che la media svizra. Marc Pittner, manader Finanziaziuns tar la Banca Chantunala Grischuna, resumescha: «L'economia grischuna ha cumprovà il 2025 sia resistenza. Il medem mument vesain nus che la dinamica è tschessada remartgablamain ils ultims mais.»

Ils exports ed il traffic signaliseschan ina sminuziun

Ina raschun centrala per la sminuziun è il svilup da l'export. Suenter ina fasa stabila durant ils emprims trais quartals dal 2025 èn ils exports regressivs dapi la fin da l'onn. Cunzunt pertutgads èn impurtants martgads da vendita sco la Germania e l'Italia che represchentan ensemen var 30 % dals exports grischuns.

Era las datas dal traffic conferman la stagnaziun conjunturala: Il traffic da camiuns, ch'è in indicatur impurtant per l'industria e la construcziun, è sa reducì marcantamain en il Grischun. L'onn 2025 è el stà en media radund 9 % sut il nivel da l'onn precedent.

Il turissem sustegna, il martgà da lavur s'indeblescha

Il turissem è sa sviluppà vinavant a moda allegraivla ed ha pudì mitigiar per part la stagnaziun conjunturala. Las pernottaziuns èn s'augmentadas il 2025 per radund 3 % ed uschia pli fitg che la media svizra. Era l'entschatta dal 2026 ha quest trend positiv cuntinuà.

Sin il martgà da lavur sa mussa percunter ina moderaziun: Il dumber da las plazzas publitgadas è stà il 2025 sut il nivel da l'onn precedent ed è sa sbassà vinavant l'emprim quartal dal 2026. Il medem mument crescha en pliras branschas il dumber da las personas che tschertgan ina plazza, cunzunt en il commerzi ed en secturs da l'industria.

In sguard en l'avegnir: damain dinamica, intschertezzas adina pli grondas

L'economia grischuna sa preschenta vinavant a moda robusta, ha dentant pers in pau il schlantsch. Ils svilupps actuals inditgeschan ina fasa da creschientscha moderada. Il medem mument s'augmentan las ristgas – en spezial en l'ambient internaziunal, quai che ha in effect adina pli grond sin las branschas orientadas a l'export.

Il Monitoring da l'economia grischuna cumplet è disponibel [online](#).

Davart il Monitoring da l'economia grischuna

Il Monitoring da l'economia grischuna è in commentari davart la conjuntura che la Banca Chantunala Grischuna publitgescha regularmain en collavuraziun cun la scola auta spezializada dal Grischun. El sa basa sin il Swiss Regional Economic Index (Swiss REco-Index) e sin ulteriurs indicaturs actuals e porscha ina contextualisaziun cumpacta dal svilup economic en il chantun.

Contact:

Gianna Meier, gianna.meier@gkb.ch, Telefon +41 81 256 83 25

Thomas Müller, thom.mueller@gkb.ch, Telefon +41 81 256 83 11

Banca Chantunala Grischuna, chascha postala, 7001 Cuir | medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universal moderna – per persunas privatas, l'economia ed il maun public. L'interpresa è represchentada en tut las regiuns dal Grischun. Cun passa 1'000 collavuraturas e collavuratur è la BCG ina da las pli grondas patrunas en il chantun. Ultra da sias activitads economicas s'engascha ella cun ses sponsoradis, ses fond da contribuziuns, sia collecziun d'art e sia lavur voluntara.

La BCG dispona da participaziuns da maiortad a la Banca privata Bellerive AG ed a l'Albin Kistler AG. Ultra da quai è ella acziunaria unica da la BZ Bank Aktiengesellschaft. Il scrit da participaziun BCG è quotà a la bursa dapi il 1985. Al resultat da gestiun 2025 è il chantun Grischun sa participà cun 103.6 milliuns francs incl. l'indemnisaziun per la garanzia statale.

Termins:

Radunanza da las participantas e dals participants: 9 da matg 2026

Rendaquint semestral 2026: 21 d'avust 2026